

## Èkwo-ozì Kẹ̀ Mbù, Pọ̀lu Deru Nù Ndu Tesalonayika

<sup>1</sup> Èkwo-ozì-a shì l'ẹ̀ka mbẹ̀dua, bụ Pọ̀lu alaru Chìochì Tesalonayika, bụ ndu kẹ̀ Chileke, bụ Nna; bya abụkwaruphọ ndu kẹ̀ Nnajiuphu, bụ Jizọsu Kéreshì. Ndu mu ẹ̀phe tukurọ dee ya bụ Sulivanusu yẹ Timoti.

Gẹ̀ Chileke meeru unu eze-iphe-oma; mek-waaphọ g'ẹ̀hu dụ unu guu.

*Umere ndu Tesalonayika waa ekwekwe phe*

<sup>2</sup> Tekenteke, anyi epfu anụ Chileke, bụ Nna anyi bẹ anyi l'anyatajẹkwa unu. Anyi nọdu anọduje ekele Chileke ekele ẹ̀hu unu g'unu ha.

<sup>3</sup> Ọ tọ dukpodaa teke anyi ta anyatajẹdu ozi unu gude ekweta jee; mẹ g'unu gude n-yemobu eseshiberu akanya ike; waa g'unu gude ọta-nshi nọdu Nnajiuphu anyi, bụ Jizọsu Kéreshì l'ẹ̀ka elshiberu ẹ̀nya mbọku ono ike. <sup>4</sup> Ụnwunna anyi; anyi makwaru-a lẹ Chileke yeru unu obu; bya ahọta unu g'unu bya aburu ndu nkiya. <sup>5</sup> Noo l'anyi byaru ezia unu ozi-oma ono; ọphu ọ bụdu-a opfu ọnu bẹ anyi gude zia ya unu kpurumu; Chileke gudekwa iya phọ goshi unu l'ike iya ereshi ire ike. Unme Chileke ono bẹ yekwaruphọ anyi ẹka; anyi dụ ike mee; unu maru ọkpobe amaru l'iphe anyi ezi bụ ọkpobe-opfu. Umere, anyi meru teke anyi l'unu shì tuko nọdukota mewarurọ unu maru ẹgube ndu anyi bụ. Ọ

kwa g'òo-duru unu lẹ ree meru g'o gude anyi mee ẹgube umere ono. <sup>6</sup> Tòbudu iya bụ; unu bya aburu ndu anwu ẹka anyi. O bwaruro unu anwu ẹka Nnajiuphu. Ophu unu eleduro ke l'unu eje iphe-ẹhuka teke e ziru unu ozi-oma ono; unu gudelaa ẹhu-utso ophu shi l'ẹka Unme-dụ-Nsọ nata ozi ono. <sup>7</sup> Oo iphe ono meru g'o gude unu bya aburu ndu iphe, bukota ndu ophu, kweru ke Kéreshi lẹ Masedoniya waa l'alị Gurisu byaru awata anwu ẹka phe. <sup>8</sup> O to budo-a l'ozi-oma ono, shi l'ẹka Nnajiuphu, bu ozi, unubedua l'ezi ono dzuru Masedoniya yee Gurisu kpurumu; obenu l'ekwekwe, unu kweru ke Chileke be ngakotaakwaru ekameka k'ophu o to duedu onye anyi a-bya akoharu iya k'iche. <sup>9</sup> Iphe, bukpo ẹka anyi jeru be aanoduje epfugbaa ke g'unu gude meshiberu anyi g'anyi byajeru ndu unu-a; me g'unu gude sefukotawaa ẹka l'agwa obvu bya aghachiwaru Chileke iphu; wata ejeru okpobe Chileke ono, no ndzu ono ozi; <sup>10</sup> bya awatakwapho ele enya Nwa iya ono, e-shi l'imigwe bya ono; mbu Nwa iya ono bu Jizosu, o meru o shi l'onwu teta nodu ndzu ono. Oo ya bu onye l'a-dzo anyi l'oke-ẹhu-eghu ke Chileke, o-tukoshi ndu eme iphe-eji.

## 2

### *Ozi, Pọlu jeru lẹ Tesalonayika*

<sup>1</sup> Su-a; unubedua l'onwunu; unwunna anyi; maru l'akpapfuta, anyi kpapfutaru unu ta abudu anyi ke mmanu. <sup>2</sup> E -gudekpooru l'anyi jewaru iphe-ẹhuka lẹ Filipayi me iphe-iphere, e meru

anyi; ọle Chileke melekwaru-a obu shihu anyi ike; k'ọphu anyi byaru ezia unu ozi-oma ke Chileke ono. Ọphu anyi ejedururo epfu kele aakpobyi iphe, anyi eme akpobyi. <sup>3</sup> Mbụ-a; teke ono, anyi l'arwo unu g'unu bya aburu ndu ke Kéreshi ono be ọ to bukwa g'anyi bya edephua unu edephu; ọphu ọ dukwa ẹjo-iphe, du anyi l'okpoma; ọphu anyi abyakwaru g'anyi haru unu ghotu l'ugho. <sup>4</sup> Ọ chikwa g'ọ du Chileke l'uche g'anyi pfua be anyi epfuje. Noo le yebedua be lewaru anyi enya maru l'anyi goshiwaru l'ọ gbaru ke ge ya gude ire anyi ẹka; o woru ozi-oma ono ye anyi l'ẹka. Anyi te epfukwa g'ọ tsoje nemadzu utso le nchi; gbahaa g'anyi pfuje iya g'oo-du Chileke ree; mbụ onye ono, l'eletaje ime obu anyi; maru iphe, anyi l'ari ono. <sup>5</sup> Unu maru-a l'onwunu l'ọ to dukpodaa teke anyi gude ire mecha mecha pfuru yeru unu. Ọphu anyi emeduru umere g'ọ bu l'oo iphe, anyi abudu be anyi suru l'anyi bu; g'eeshi g'anyi erita iphe l'ẹka unu. Ọ kwa Chileke bu onye a-haru anyi enge iphe, anyi epfua. <sup>6</sup> Anyi te emekwaru ge ndiphe; ọzoo g'unubedua; ọzoo ge ndu ọzo jaa anyi ajaja. A makwaru-a l'eshinu anyi bu ndu-ishi-ozu Kéreshi be ọ gbaru g'unu vuru mkpa-ehu anyi; <sup>7</sup> obenu l'anyi duru unu odoo ge nwanyi adujeru unwegirima iya-a. <sup>8</sup> Anyi yeru unu obu shii; k'ọphu ọ to budu-a ozi-oma ke Chileke ono kpurumu be anyi l'unu gba mgba; anyi gbakwapho ndzu anyi mgba; kele unu dunukaru anyi l'obu.

<sup>9</sup> Mbụ-a; unwunna anyi; unu nyatajeka egube akanya, anyi seru; l'anyi jekwaru ozi kuta

ephuru phee. Teke ono anyi l'ezi unu ozi-oma ono, shi Chileke l'eka ono be anyi jeru ozi l'eswe jee ya l'enyashi gude ejeta nri, anyi e-ri; g'o to du onye anyi a-buru ivu-erwa swiru. <sup>10</sup> Unu anodu agbakpodaru anyi odzori. Nokwapho ge Chileke a-nodukwapho agbaru iya anyi. Umere, anyi shi emejeru unube ndu kwetaru ozi-oma ono gekwaru egeru bya aburu umere, pfuru nhamunha. O to dukpodaa eka anyi metaru iphe, aata anyi uta. <sup>11</sup> Unu maru l'oo ge nna anoduje ehe unwu iya-a bu g'anyi shi gude ehe unu l'ehu l'ehu. Anyi duru unu obu; bya emee g'obu shihu unu ike; anyi pfushiaru iya unu ike; <sup>12</sup> su g'unu meje iphe, du Chileke ree; mbu onye ono, kuru unu g'unu bata l'eka ya bu eze; waa l'odu-biribiri iya ono.

<sup>13</sup> Iphe, meru g'o gude ophu anyi atuwojedu eka ekele Chileke ekele me anyi -nodu epfu anu iya bu; le teke unu numaru opfu Chileke ono, anyi byaru ezia unu ono be unu ta anataduru iya ge opfu nemadzu; obenu l'unu nataru iya ge Opfu Chileke; o bukwarua Opfu Chileke be o bu eviya. Noo kele oo Chileke ono be l'ere ire l'ime unube ndu nataru ozi-oma ono. <sup>14</sup> Unwunna anyi; oo iphe ono, nwuru unu ono bu iphe, shi nwuru Chiochi ke Chileke, bu ndu ephe le Kereshi tugbaru buru nanu l'ali Jiudiyia. Oo 'epho ge ndu ali unu eme unu mkpawere bu ge ndu ali ephebe ndu Jiu shi eme phe iya. <sup>15</sup> Oo ndu Jiu ono be bu ndu ono, gburu Nnajiuphu, bu Jizosu; gbua ndu mpfuchiru Chileke; chia anyibedua chifu l'ali phe. Ephe gude egube ono meta iphe, ta adudu Chileke ree swibe onwophe.

Ɛphe buru oḡu duru onyemonye. <sup>16</sup> Ɛphe kpōshiru anyi ezi ndu abūdu ndu Jiu ozi-oma, l'adzo phe nū ono. Ɔ tō dukpodaa teke Ɛphe te emetajēdu iphe-ēji jasū l'oobe phe l'ēkpiri. Ɔle oke-ēhu-eghu kē Chileke bē mechakwanaaru dapfuta phe.

### *Oḡu Pōlu Ɛgu akpapfu ndu Tesalonayika*

<sup>17</sup> A bya abya l'ēhu k'anyi; unwunna anyi; anyi nōakwaru nwōdu ophu anyi l'unu ahūmaduru; oḡe obu anyi nōkwa-a l'ēka unu nō. Oghoroko unu dūta-beru anyi; k'ophu bū l'anyi shiwaa ūzenya seta g'eeshi g'anyi l'unu hūmakpoo ozo.

<sup>18</sup> Anyi shi eme g'anyi eme kpapfuta unu; mbēdua, bū Pōlu l'ishi onwomu tūkpōakwaru onyo abyabya ugbo olemole; ophu Nsetanu ekwedu g'anyi bya. <sup>19</sup> G'ōoduhabe; ?o duru ophu abūedu unu kpūrumu bē bū ndu anyi chīru ūpfu yeru bya abūru unu l'e-me g'ēhu tsoo anyi ūtso; bya abūru unu bē l'a-būru obunggo, anyi e-gudeje eku onwanyi l'atatiḡhu Nnajiuphu anyi, bū Jizosu Kéreshi mē o -byalēpho ozo. <sup>20</sup> Mbū-a; o kwa unubēdua bū iphe, ee-gude jaa anyi ajaja bya abūru unu bū ēhu-ūtso anyi.

## 3

<sup>1</sup> No iya; a nōnyakpoo; oghoroko unu ono dūta-be anyi; k'ophu anyi adūedu ike tagbua ya lē nshi; anyi chīa idzū sū l'anyi a-nōduwanu lē Atēnsu nkīnyi anyi. <sup>2</sup> Anyi zia Timoti, bū nwune anyi nwoke; bya abūru onye-ozī kē Chileke; buru onye anyi l'iya tūkoru ese akanya k'ezi ozi-oma kē Kéreshi ono; g'ō bya emee g'unu

kabaa apfushi ike; l'o mekwapho g'obu kabaa unu eshihu ike l'iphe, unu kweru. <sup>3</sup> G'o to du g'unu ha onye e-gude k'ehu-a, aakpa unu-a kpolaahaa azu; eshinu unubedua l'onwunu maru l'iphemiphe ono bu iphe, nwufutajenu l'ehu anyi. <sup>4</sup> Le-a; anyi gbuakwaru iya unu tororo; teke ono, anyi no l'ibe unu ono su unu l'ee-mekwa anyi ewere. Nta-a be unu eleanaa l'o nwuwaru egube ono obu; o buru iphe, unu tukoru makotaru. <sup>5</sup> Noo g'o gude mu nonyaa; ophu mu aduedu ike takota nshi; mu zia g'a bya amaru g'unu pfu-shiberu ike l'ekwekwe, unu kweru ke Chileke. Le mu tsuhukwaru ebvu su ?a maru nwandale ono ta ahudaaaru nu unu ama; akanya ono, anyi seru l'ehu unu ono buru akanya ola-l'iswi.

<sup>6</sup> Ole nta-a be Timoti shiwaa l'eka unu no lwawaa lwapfuta anyi bya ezia anyi ozi, du ree su l'unu kweshiru-a ike; bya enweru nyemobu; teme unu nodu anoduje anyata anyi okpobe anyata tekenteke. L'oo g'oghoroko unu aduje anyi bukwapho g'oghoroko anyi du unu. <sup>7</sup> Unwunna anyi; o kwa l'unu pfuru pfushia ike l'ekwekwe, unu kweru ke Chileke meru g'o gude obu nodu eshihuje anyi ike l'iphe, bukpoo iphe-ehuka, anyi eje; mekpoo ewere, eemekota anyi. <sup>8</sup> Kele oo nta-a be ndzu bu anyi okpobe ndzu; eshi ophu unu pfuru pfushia ike l'atugba, unu le Nnajiuphu tugbaru. <sup>9</sup> Su-a; ?denukpoo g'anyi a-wata awata ekele Chileke ekele ehununu; me k'ehu-utso ono, o meru o nodu atso anyi l'iphu yebe Chileke opfu ehununu ono? <sup>10</sup> Eswe l'enyashi be anyi egudeje obu anyi g'o ha epfu

anụ Chileke epfushi iya ike sụ g'o mee g'iphu anyi l'unu kpogba; g'anyi e-mekwanaa; ẹka unu teke ekweshidu ike g'unu kweshia ike.

<sup>11</sup> Nta-a bụ ọ́ ẹ Chileke anyi, bụ Nna anyi l'onwiya; mę Nnajiuphu anyi, bụ Jizosu Kéreshi tọoru anyi ụzo, anyi e-shi abya unu agbaphe. <sup>12</sup> Teme ọ́ Nnajiuphu mekwaapho g'unu kabaa eye nwibe unu obu; mbụ g'unu kwata ye phẹ iya yeshia phẹ iya ike; ye phẹ iya k'anyinyi. Nokwapho g'unu e-ye iya nemadzu mgburugburu. Ono bukwarupho g'anyi yeru unu. <sup>13</sup> Oo ya bụ; g'oo-mee g'obu shihu unu ike; unu a-pfuru l'iphu Chileke, bụ Nna anyi buru ndu dube ree. O to dudu ẹka uta aduru unu teke ono, Nnajiuphu anyi, bụ Jizosu Kéreshi yee ndu nkiya a-swiru bya ono.

## 4

### *Umere, du Chileke ree*

<sup>1</sup> Unwunna anyi; iphe ozo, anyi no l'eka Nnajiuphu anyi bụ Jizosu epfuru unu epfushiru iya unu ike bụ l'iphe, unu nwutaru l'eka anyi bukwa g'unu l'e-shi gude ndzu unu eme iphe, du Chileke ree emeshi iya ike. O buerupho iphe ono be unu emeepho. Nta-a bukwa g'unu kabaa ya emeshi ike. <sup>2</sup> Noo l'unu mawaru-a l'anyi shi l'eka Nnajiuphu, bụ Jizosu tularu unu ekemu. <sup>3</sup> Sụ-a; iphe, du Chileke ree g'unu meje iya bụ; g'unu dobe onwunu nsọ l'eka Chileke; mbụ g'unu ta anodukwa apharwushi onwunu ililekpoo. <sup>4</sup> Mbụ-a; g'onyenonu le g'unu ha majekwaru g'ooshi eme ehu iya g'o du nsọ;

buru iphe, aakwabe ùbvù. <sup>5</sup> Unu te egudejekwa aphù kparìkpari iya dalahu iya je alù a gè ndu abùdu ndu Jiu, bù ndu amadù Chileke. <sup>6</sup> Oo ya bù g'ò tò dù onye e-meswe nwibe iya; ophu o dukwa onye e-mekputa nwibe iya. Mbù-a; anyi pfuhaakwaru iya tsua ya unu atsutsu lè nchì; sù l'onye eme egube iphe ono bè Nnajiuphu agwakwa ochi. <sup>7</sup> Noo lè Chileke ta abukwa g'anyi bya emerwushije onwanyi bè o kuru anyi oku iya; o kwa g'anyi dù nsò. <sup>8</sup> Oo ya bù; l'onye jìkaru iphe ono, anyi ezi ono ta abukwa nemadzù bè o jìkaru. O kwa Chileke b'ò jìkaru; mbù Chileke ono, anuje Unme-dù-Nsò iya ono.

<sup>9</sup> A bya abya lè k'eye unwunna unu obu; ono ta abuhakwa iphe, aa-bya awataru unu ederu l'ekwo. Noo kèlè unubèdua l'onwunu bè Chileke l'onwiya ziwaru eye nwibe unu obu. <sup>10</sup> Mbù unu nòdu emeekwapho g'o ziru iya unu; bya eyee unwunna anyi, nòkota lè Masedoniya mgburugburu obu egube ono. O lè iphe, anyi epfushiru unu ike; unwunna bù; g'unu kabakpòoro eme egube ono kwaseru. <sup>11</sup> Unu kukebeje èhu g'unu nòdujeepho lè nchì odoo; leta enya l'èje ozi èhu unu; gude èka unu setajè iphe, unu e-gude buru, bühukwaa iphe, anyi pfuhawaru unu-a. <sup>12</sup> Noo iphe unu a-nòduje eme: o buru iya bù umere, gbaru unu l'èka ndu ta abùdu ndu kè Kéreshi nò; k'ophu ephe a-kwabeje unu ùbvù; o tò dukwanu onye unu a-sù l'òo ya tème unu emee mkpa, dùru unu.

*Abyabya Nnajiuphu*



<sup>13</sup> Ụnwunna anyi; iphe, anyi eme g'o doo unu ẹnya bụ ke ndu nwuhuru anwuhu; g'ootoo rwujekwanu unu l'ehu shii g'oorwuje ndu te eledu ẹnya kele ẹphe le Kéreshi emecha nọdukota. <sup>14</sup> Anyi kwetawaru kweshia ike le Jizosu nwuhuchaaru bya eteta nọdu ndzu. Nokwapho g'anyi kwekwarupho le Chileke e-shi Jizosu l'eka tuko ndu woadaru onwophe ye Jizosu l'eka teme ẹphe nwuhu mee g'ẹphe le Jizosu tuko teta nọdu ndzu; mee ẹphe etsoru iya bya.

<sup>15</sup> Sụ-a; iphe-a, anyi epfuru unu-a be bukwa ozi, shi Nnajiuphu l'onu; l'anyiibe ndu ophu a-nọdukwadia ndzu teke ono, Nnajiuphu a-bya ozo ono; be tee vukwaru ndu ophu nwuhuhawaru nu pho uzo. <sup>16</sup> Noo le Nnajiuphu l'onwiya be e-shi l'imigwe alwazeta l'ali; gude olu eze onye-ishi ojozi-imigwe echi mkpu; egbukwapho opu Chileke. Tọbodu iya bu; ndu ono kwetaadaru ke Kéreshi teme ẹphe nwuhu ono evuru uzo teta nọdukota ndzu. <sup>17</sup> Chileke ezichata anyiibe ndu ophu nọkwadu ndzu teke ono; anyi l'ẹphe atuko nọdu l'ime urwukpu jeshia Nnajiuphu, bu Jizosu ndzuta l'ephekerephe k'ophu bu; ẹka Nnajiuphu nọkpoepho; anyi anodu. <sup>18</sup> Oo ya bu; unu gudeje opfu-a dua nwibe unu obu.

## 5

### *Anwuru ẹnya kwaberu abyabya Nnajiuphu*

<sup>1</sup> Sụ-a; unwunna anyi; o to buhekwaro iphe, aa-bya awata ederu unu l'ekwo su unu l'o waa

egube teke o bu; ozoo l'ọ waa mboku, iphemiphe  
 ono e-me. <sup>2</sup> Kele unubedua l'onwunu maru  
 okpobe amaru le mboku, Nnajiuphu a-bya be a-  
 tu l'upfu g'iphuru, byaru oshi l'enyashi. <sup>3</sup> Kele  
 oo teke ndiphe suru: "Ha! Mgboko dukwaa  
 jii nta; oo akwa g'onyenonu jeje aka du iya  
 ree." Noo teke bu; a -bya amaru ola-l'iswi atu  
 phe l'uzorehu g'ezeda atuje nwanyi, du ime-  
 a; woru phe yifu; o to dudu me onye lanu  
 anahu nu. <sup>4</sup> Obenu-a; unwunna anyi; unubedua  
 ta anokwa l'ochii ke ge mboku ono tu unu  
 l'uzorehu g'abyabya onye-oshi. <sup>5</sup> Noo kele g'unu  
 ha be bu ndu bu l'iphoro me l'eka bu eswe. Anyi  
 ta abukwa ndu bu l'eka bu enyashi; ophu anyi  
 abukwa ndu bu l'ochii. <sup>6</sup> Oo ya bu; l'eshinu  
 o du egube ono; g'anyi te kukwaru mgbenya  
 ge ndu ophuu ekugbaa. O chia g'anyi nwuru  
 enya; g'enya doo anyi risaa. <sup>7</sup> Mbua; ndu eku  
 mgbenya bukwa l'enyashi be ephe ekuje iya.  
 O buru l'enyashi be ndu angutaje mee akpo  
 kulakula anguje iya akpo iya. <sup>8</sup> Obenu l'eshinu  
 anyibedua bu l'eka bu eswe; g'enya donaa anyi  
 risaa. G'ekwekwe, anyi kweru ke Chileke yee  
 eye obu, anyi yeru ibe anyi buru uwe-igwe,  
 anyi e-yeje; mbu uwe-igwe, l'egbobutaje anyi  
 okpoma. G'adzota ono, anyi ele enya iya ono  
 buru okpu-igwe, anyi e-kpuru. <sup>9</sup> Chileke ta  
 atukwaru anyi aka g'anyi buru ndu ya a-tukoshi  
 oke-ehu-eghu iya. O chikwa g'anyi buru ndu  
 ya e-shi Nnajiuphu anyi, bu Jizosu Kereshi l'eka  
 dzota. <sup>10</sup> Mbu Jizosu ono, nwuhu-chiru anyi  
 ono; g'oo-buru e -mechaa; anyi l'iya atuko dzuru  
 ndzu teke oo-bya; me anyi -no ndzu; me anyi

-nwùhuru anwùhu. <sup>11</sup> Noo g'o gude anyi sù unu-a; unu meje g'obu shihu nwibe unu ike. Unu eyejekwaruphọ nwibe unu ẹka g'ẹphe pfushia ike l'iphe, ẹphe kweru, bụnaa iphe, unu emena-a.

### *Iphe, unu e-meje*

<sup>12</sup> Ụnwunna anyi; ọ kwa arwọrwo bẹ anyi arwọ unu sù g'unu kwatajẹ kwabẹ iphe, bụ ndu ono, l'ese akanya ẹhu unu ono ùbvù, bụ phẹ bụ ndu ono, Nnajiuphu hotaru g'ẹphe bụru ishi unu; bụkwarupho ndu a-nọdu akpọ-ziru unu ọzo. <sup>13</sup> Unu egudekwaphọ k'ozi ono, ẹphe ejeru unu ono eyeru phẹ eso; yekwaa phẹ phọ obu ọkpobe eyeye. Unu l'ibe unu eburu lẹ nchị odoo.

<sup>14</sup> Ọo arwọrwo bẹ anyi arwọkwapho unu ụnwunna; sù g'unu lojeru ndu ẹnyiru-ozì ẹka lẹ nchị. Ndu ọphu obu ebvuduru ebvuru bẹ unu e-meje g'obu shihu ike. Ndu ekweshiduru ike bẹ unu eyejeru ẹka g'ẹphe kweshia ike. Unu atajeru onyemonye nshi. <sup>15</sup> Unu letajẹ ẹnya g'ọ tọ dọ g'unu ha onye e-gudeje ejọ-iphe melata nemadzọ iphe-ẹji, o meru iya. Gbahaa iphe, unu a-nọdujeepho achị nta iya bụ g'unu e-shi mejeru nwibe unu ree; mekwaaru iya phọ onyemonye ọzo.

<sup>16</sup> G'ẹhu tsojekpoeppho unu uto tekenteke. <sup>17</sup> Unu ta atuwojekwa ẹka l'epfu anụ Chileke mkpụrumkpuru. <sup>18</sup> Unu keje Chileke ekele iphemiphe, anwuru unu g'iphe aduhabe. Noo iphe, Chileke achọ unu l'ẹka bụ ono; unubedua, unu lẹ Kéreshi tųgbaru bụru nanu-a.

<sup>19</sup> Unu ta agbanyijekwa iphe, Unme-dụ-Nsọ eme. <sup>20</sup> Ọphu unu anmajekwa mpfuchiru phulaphula. <sup>21</sup> Ọle-a; unu hujekwa iphemiphe ama; họta ọphu dụ ree; gudepyabeshia ya ẹka ike. <sup>22</sup> Unu esefukọta ẹka l'iphemiphe, bụ ẹjo-iphe g'ọ duhabe.

### *Opfu mkpochi-ishi*

<sup>23</sup> Anyi sụ-a; gẹ Chileke, bụ iya emeje g'anyi buru l'ẹhu-guu mee unu g'unu buru ndu nkiya ọkpobe aburu. G'o dobe ndzụ unu l'ophu; mbụ uche unu mę obu unu mę ẹhu unu; l'o dobe iya nno g'ọ tọ dụ ẹka ụta a-dụ iya teke Nnajiuphu anyi, bụ Jizosu Kéreshi a-bya ọzo. <sup>24</sup> Iphe ono bę bụ iphe, oo-mekọta g'ọ ha; noo kẹle ọo ya kuru unu; tẹme ọ buru onye apfushije ike l'iphe, o pfuru.

<sup>25</sup> Ụnwunna anyi; unu pfujekwa nụ Chileke l'opfu ẹhu anyibedua.

<sup>26</sup> Unu kelekwa iphe, bụ unwunna anyi g'ephe ha ekele nmata phę akpa, dụ nsọ.

<sup>27</sup> Iphe, mu eme gẹ mu pfuaru unu bụ; unu gụkwaa ẹkwo-ozia g'o rwudzuru unwunna l'ophu lę nchị. Nnajiuphu anụkwaa iphe-a, mu epfu-a.

<sup>28</sup> Gẹ Nnajiuphu, bụ Jizosu Kéreshi meeru unu eze-iphe-oma g'unu ha. Nokwa g'ọ dụ.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d